

INUIT ATAQATIGIIT INATSISARTUNI



Nuuk, 28.10.2024

Inatsisartut Suleriaasianni § 37 naapertorlugu Naalackersuisunut apeqquq
imaattoq matumuuna saqqummiuppara.

Naalackersuisunut apeqquq:

- 1. Najugaq qimannagu ilinniarnernup ilinniarfinni tamani qinigassatut periarfissanngortinneqarsinnaanera Naalackersuisunit qanoq isumaqarfigineqarpa?**
- 2. Najugaq qimannagu ilinniarnernup ineriartortinneqarnerata kingunerisinnaasai pitsaaqutit pitsaanngequtillu suusinnaappat?**
- 3. Najugaq qimannagu ilinniarnernup pitsaassusaata qaffassarnissaani suut ineriartortinneqassappat?**
- 4. Najugaq qimannagu ilinniarfiit pitsaassusaasa qaffassarnissaannut suut pisariaqartinneqarpap?**

(Inatsisartunut Ilaasorta, Edvard Nielsen Aronsen Inuit Ataqatigiit)

Tunngavilersuut:

Ukiuni makkunani ilinnialeraluarlutik uniinnartartut amerlavallaarujussuarnerat tamatta isumaqatigiissutigisinnaagunarpaput. Unitsitsiinnartarnerup peqqutaasa ilangaat angajoqqaat qimallugit inuunerup oqimaappallaartarnera aammalu meeraqarsimagaanni meerarisaat qimallugit atuarnernup ingerlanneqartarnerata ilaqutariittut oqimaallivallaartarnera. Tassunga ilanngullugu ilinniartut najugaqarfigisinnaasaannik sinerissami amigaateqartuarneq ilaatigullu sumiiffigisaq unitsitsiinnartarnermi oqimaalutaaqataapput.

Nunatut namminiilivikkiartortut piffissanngorsoraara nunatsinni ilinniarsimassutsip qaffarnissaa, aammalu ilinnialeraluarlutik unitsitsiinnartartorpassuit ikilisarnissaat. Aaqqiissutissallu ilaattut isigalugu najugaq qimannagu ilinniarnernup annertusaavigineqarnissaa isumassarsiatsialattut isigalugu soqutigaa paasissallugu tamatuma nunatsinnut ilinniarsimassutsimut qaffassaaqataasinnaanera Naalackersuinikkut qanoq isumaqarfigineqarnerasoq.

Misilittakkat arlallit pitsaasumik tikkuussereerput, tamatumalu paasinarsisippaa najugaq qimannagu ilinniarneq nunatsinni isorartuumi nunaqariuseqarnitsinnut tulluurtuusoq. Taamaattumik soqutigaa paasissallugu ilinniarfinni tamani najugaq qimannagu ilinniarneq annertusarneqassappat tamatuma nunatsinnut

INUIT ATAQATIGIIT INATSIARTUNI



aningaasatigut qanoq kinguneqarsinnaanera aammalu pitsaanngequtit pitsaaqutillu suusinnaaneri. Suliffeqarfinnimi tamani ilinniarsimassuseq qaffassassagutsigu aqqutit suusinnaaneri tamaasa misissorlugillu nalilersortariaqarpagut inuiaqatigiit ilinniarnermikkut naammassissaqarnerusinnaanerannut alloriassagutta.